

STATUTI

I

URDHRI TË MJEKËVE TË SHQIPËRISË

Statuti i Urdhrit të Mjekëve të Shqipërisë (më tej Urdhri ose UMSH) është i bazuar në Ligjin Nr. 123/2014, datë 25.09.2014 "Për Urdhrit e Mjekëve në Republikën e Shqipërisë", Ligjin Nr. 10106, datë 30.03.2009 "Për Kujdesin Shëndetësor në Republikën e Shqipërisë" dhe Ligjin 10171, datë 22.10.2009 "Për profesionet e rregulluara në Republikën e Shqipërisë".

KREU I PARE

PARIME TE PERGJITHSHME

Neni 1

Qëllimi

Ky Statut ka për qëllim rregullimin e të gjithë veprimtarive të Urdhrit, organeve dhe strukturave të tij, si një akt i brendshëm normativ për zbatimin e Ligjit dhe mbarëvajtjen e veprimtarive në bazë të tij.

Neni 2

Statusi

Urdhri është **ENT PUBLIK**, profesional, i pavarur, i cili përfaqëson dhe mbron interesat e përbashkëta të anëtarëve dhe rregullon veprimtaritë dhe marrëdhëniet midis tyre në funksion të publikut.

Si autoritet i vetrregullimit profesional i pavarur është i depolitizuar dhe i departizuar, i hapur dhe i barabartë për të gjithë anëtarët, pavarësisht nga përkatësitë e tyre sociale, racore, etnike, fetare apo bindjet politike.

Është kategorikisht e ndaluar që në organet e strukturat e të gjitha niveleve të Urdhrit të diskutohen apo reflektohen dukuri a probleme të karakterit politik, partiak, racor, etnik e fetar.

Neni 3

Përbërja

1. Janë anëtarë të Urdhrit të Mjekëve të gjithë mjekët/mjekët specialist që ushtrojnë profesionin në sistemin shëndetësor publik dhe privat në Republikën e Shqipërisë,

të cilët përmbushin kushtet për të qenë anëtarë sipas Ligjit 123/2014, datë 25.09.2014 “Për Urdhrin e Mjekëve në Republikën e Shqipërisë”.

- Anëtarësimi në Urdhër është parakusht për ushtrimin e profesionit.** Asnjë individ nuk mund të ushtrojë profesionin në sistemin e kujdesit shëndetësor në Republikën e Shqipërisë pa qenë anëtar i Urdhrit të Mjekëve dhe pa qenë i pajisur me Liçensën për ushtrimin individual të profesioni të lëshuar nga ky Institucion.

Neni 4 Misioni

Misioni i Urdhrit të Mjekëve është ruajtja e standardeve të larta në formimin dhe ushtrimin e profesionit në fushën e mjekësisë dhe mbrojtja e pacientëve dhe publikut nga kequshtrimi i profesionit të mjekut.

Për të përmbushur misionin e tij, Urdhri i Mjekëve ushtron këto kompetenca:

- Mban Regjistrin Themeltar të Urdhrit dhe menaxhon sistemin e administrimit dhe përditësimin të tij;
- Vendos standarde etike dhe deontologjike, të detyrueshme për çdo mjek dhe monitoron zbatimin e tyre gjatë ushtrimit të profesionit;
- Rivlerëson periodikisht kompetencën dhe performancën profesionale të anëtarit të Urdhrit përballë standardeve të vendosura;
- Nxit arritjen e standardeve të larta në edukimin dhe formimin profesional dhe etik të anëtarëve të Urdhrit;
- Bashkëpunon me Qendrën Kombëtare të Edukimit në Vazhdim, institucione të tjera shkencore dhe arsimore për të siguruar standarde të larta në Edukimin e Vazhdueshëm Mjekësor, kualifikimet dhe specializimet pasuniversitare të anëtarëve të Urdhrit;
- Jep dhe heq licencën individuale të ushtrimit të profesionit;
- Mbron të drejtat e anëtarëve të Urdhrit, integritetin moral dhe profesional të tyre e të profesionit mjekësor

Neni 5 Bashkëpunimi

Urdhri i Mjekëve, gjatë veprimtarisë së tij, bashkëpunon me:

- Ministrinë përgjegjëse për shëndetësinë. Në këtë kuadër:

- a. Urdhri i Mjekëve informon çdo 6 muaj ministrinë përgjegjëse për shëndetësinë lidhur me anëtarësimet, gjykimet disiplinore dhe probleme të tjera me interes të ndërsjelltë.
 - b. Urdhri i Mjekëve bashkëpunon me ministrinë përgjegjëse për shëndetësinë për hartimin e projektligjeve dhe dokumentave të rëndësishëm në fushën e shëndetësisë.
2. Ministrinë, institucionet qendrore, institucionet e arsimit të lartë dhe organizma të tjerë publik ose jo publik, të krijuara me ligj sipas legjislacionit në fuqi.
 3. Inspektoratin Shtetëror Shëndetësor.
 4. Organizma të huaja dhe forume ndërkombëtare.
 5. Për kontradiktat gjatë bashkëpunimit me institucionet e lartpërmendura në pikat 1, 2 dhe 3, Urdhri i Mjekëve i drejtohet dhe informon Kuvendin e Shqipërisë, përkatësisht Komisionin përgjegjës për shëndetësinë.

KREU I DYTE
Pjesa e parë
Anëtarësimi dhe Liçensimi

Neni 6
Anëtarësimi

Të gjithë mjekët shqiptarë apo të huaj që ushtrojnë profesionin e mjekut në Republikën e Shqipërisë duhet të jenë anëtarë të Urdhrit të mjekëve dhe duhet të plotësojnë këto kritere:

– Për shtetasit shqiptarë

a) të kenë diplomën e mjekut, mjekët specialistë edhe diplomën e specialitetit, të lëshuar nga institucioni i arsimit të lartë brenda apo jashtë shtetit, të njohura nga ministria përgjegjëse për arsimin;

b) të mos jenë të dënuar me vendim të formës së prerë për vepra penale apo për kryerjen e një kundërvajtjeje penale me dashje, në momentin e kërkesës për anëtarësim;

c) të njohin dhe të zotohen me shkrim se do të zbatojnë kërkesat e legjislacionit në fuqi, Statutit, Betimin e Mjekut dhe Kodin e Etikës dhe Deontologjisë Mjekësore.

– Për shtetasit e huaj

Çdo mjek, shtetas i huaj, që të ushtrojë profesionin si rezident në Shqipëri, apo i atashuar në një institucion shëndetësor kur vjen periodikisht për ushtrimin e profesionit, duhet të ketë edhe këto dokumente:

a) lejen e qëndrimit dhe të punës në Republikën e Shqipërisë;

b) çertifikatën e sjelljes së mirë profesionale (Good Standing Certificate) nga Urdhri/dhoma apo shoqata e mjekëve të vendit të vet, ku vërtetohet se është i regjistruar dhe ushtron profesionin dhe se nuk ka marrë masa ndëshkimore;

c) njësimin (konvalidimin) e diplomës dhe çertifikatave të specializimeve të kryera prej tij/saj;

ç) rekomandim nga një specialist vendas i së njëjtës fushë, anëtar i Urdhrit të Mjekëve;

d) dëshmi të njohjes së gjuhës shqipe, të vërtetuar nga një autoritet i licençuar nga shteti. Mjeku jorezident detyrimisht punon me përkthyes.

3. Proçesi i **Regjistrim-Anëtarësimit**, *administrimi i Regjistrimit*, si dhe dhënia e **Liçensës për ushtrimin individual të profesionit** kryhet në bazë të Rregullores së Regjistrim-Liçensimit, e cila miratohet nga Këshilli Kombëtar.

Neni 7

Ri-anëtarësimi dhe rifitimi i së drejtës për ushtrimin e profesionit

Mjeku/mjeku specialist, i cili për çfarëdo arsye, nuk ka ushtruar profesionin për një periudhë mbi 5 (pesë) vjet, për të rifituar të drejtën për të ushtruar profesionin duhet:

- a)** Të kryejë proçedurat e ri-regjistrimit dhe ri-anëtarësimit në Urdhrin e Mjekëve, në përputhje me kërkesat e këtij Statuti dhe të Rregullores për Regjistrimin, Anëtarësimin dhe Dhënien e Liçensës për ushtrimin individual të profesionit.
- b)** T'i nënshtrohet ushtrimit të praktikës profesionale të mbikqyrur, në profilin e vet, për një periudhë prej 6 (gjashtë) muaj. Në përfundim, të pajiset me dokumentin zyrtar ku të konfirmohet aftësia për të ushtruar profesionin si i pavarur.
- c)** Të pajiset me Liçensën për ushtrimin individual të profesionit.

Neni 8

Tarifat për aktet dhe dokumentat që lëshohen nga Urdhri

Për veprimet që kryen për regjistrim-anëtarësim, pajisjen me Liçensën për ushtrimin individual të profesionit, kartën e anëtarësimit, si dhe për akte dhe dokumenta të tjera që lëshohen nga Urdhri, çdo individ paguan tarifat të cilat përcaktohen me vendim të Këshillit Kombëtar të Urdhrit.

Neni 9

Ankimimi për refuzimin e anëtarësimit

Ndaj vendimit që refuzon kërkesën për regjistrim e anëtarësim, kërkuuesi ka të drejtë të ankohet pranë Aparatit Qëndror Ekzekutiv të Këshillit Kombëtar jo më vonë se 30 ditë nga dita e shpalljes dhe marrjes së njoftimit për vendimin.

Komisioni apo sektori përgjegjës pranë Këshillit Kombëtar e shqyrton atë jo më vonë se 30

ditë nga paraqitja e ankesës dhe merr vendimin përkatës të cilin ia njofton ankuesit.

Ky vendim është i formës së prerë.

Kërkuesi ka të drejtë t'i drejtohet përsëri Këshillit Rajonal përkatës me kërkesë për anëtarësim vetëm nëse ka plotësuar kushtet penguese për pranimin e anëtarësimit.

Neni 10

Mjekët në pension

Mjekët në pension dhe mjekët invalidë mbeten në regjistër si anëtarë të Urdhrit të Mjekëve dhe kanë të drejtë të ruajnë anëtarësinë pa qenë të detyruar të paguajnë kuotizacionin e anëtarësisë. Nëse ata punësohen (në institucione publike apo private) ose vetpunësohen, i nënshtrohen të gjithë të drejtave dhe detyrimeve të anëtarit të Urdhrit.

Neni 11

Pezullimi i të drejtës për ushtrim të profesionit dhe ndërprerja e anëtarësimit

1. Anëtarit të Urdhrit i hiqet përkohësisht e drejta e ushtrimit të profesionit ose i pezullohet dhënia e saj kur:

- a) Ka një vendim të formës së prerë të Komisionit Disiplinor Kombëtar të UMSH-së;
- b) Është duke vuajtur një dënim penal me heqje lirie me vendim gjyqësor të formës së prerë;
- c) Nuk i ka shlyer kuotizacionet brenda afateve të parashikuara në Statutin e UMSH-së;
- ç) Nuk ka plotësuar detyrimet e Kodit të Etikës dhe Deontologjisë Mjekësore.
- d) Nuk ka kaluar provimet apo testet e caktuara për një detyrim kualifikimi apo praktike profesionale të parashikuara me një vendim disiplinor të formës së prerë.

2. Për periudhën e heqjes së përkohshme (pezullimit) të të drejtës së ushtrimit të profesionit, mjeku ruan regjistrimin dhe anëtarësimin në UMSH në përputhje me dispozitat statutore për anëtarët e Urdhrit, por nuk gëzon të drejtën për ushtrimin e profesionit.

3. Heqja e të drejtës së ushtrimit të profesionit mbi 3 (tre) vjet bëhet vetëm me vendim gjyqësor të formës së prerë.

4. Veprimet procedurale për heqjen e përkohshme të të drejtës së ushtrimit të profesionit (ndërprerja anëtarësie) kryhen në mbështetje dhe në përputhje të plotë me dispozitat ligjore, dispozitat e Statutit, Kodit të Etikës dhe Deontologjisë Mjekësore dhe Rregullores së Gjyimit Disiplinor Profesional.

Pjesa e dytë

Të drejtat dhe detyrat e anëtarëve

Neni 12

Të drejtat

Anëtari i Urdhrit të Mjekëve ka të drejtë:

1. të ushtrojë profesionin në profilin e vet;
2. të apelojë në organet e Urdhrit kur i shkelen të drejtat dhe mundësitë për ushtrim të lirë dhe të pavarur të profesionit nga cilido qoftë;
3. të zgjedhë e të zgjidhet në organet e Urdhrit;
4. të marrë pjesë në shqyrtimin nga organizmat e Urdhrit për probleme që kanë të bëjnë me personin e tij;
5. të apelojë në forumet e Urdhrit vendimet e këtij organi kur ai i gjykon të padrejta;
6. të kërkojë krijimin e kushteve të favorshme për ushtrimin normal të profesionit, për formimin dhe zhvillimin e tij profesional, si dhe për përparimin e karrierës së tij.

Neni 13 Detyrat

Anëtari i Urdhrit të Mjekëve ka këto detyra:

- 1) të njohë dhe zbatojë Kodin e Etikës dhe Deontologjisë Mjekësore, Ligjin dhe Statutin e UMSH-së, si dhe ligjet dhe aktet e tjera nënligjore mbi shëndetësinë dhe kujdesin shëndetësor në Republikën e Shqipërisë.
- 2) të ushtrojë profesionin dhe të ketë sjellje të mirë profesionale në përputhje me kërkesat dhe standardet e Kodit të Etikës dhe Deontologjisë Mjekësore, si dhe në respekt të ligjeve dhe akteve të tjera administrative në fushën e mjekësisë.
- 3) të punojë pa ndërprerje për rritjen e standardeve dhe të cilësisë së kujdesit shëndetësor në institucionin ku punon, të marrë pjesë rregullisht në programet e Edukimit të Vazhdueshëm Mjekësor, të jetë i azhornuar dhe kompetent në profesion.
- 4) të mos pajtohet me qëndrimin dhe sjellje të kolegëve dhe personelit tjetër mjekësor, të cilat nuk përshtaten me standardet dhe kërkesat e Kodit të Etikës dhe Deontologjisë Mjekësore, apo rrezikojnë shëndetin dhe jetën e të sëmurëve.
- 5) të shlyej në kohë kuotizacionin e anëtarit dhe çdo detyrim tjetër në marrëdhënie me Urdhrin në përputhje me kërkesat e këtij Statuti dhe me Rregulloret e tjera të tij.
- 6) të jetë i pajisur me Liçensën për ushtrimin individual të profesionit.

KREU I TRETE

ORGANIZIMI DHE DREJTIMI

Neni 14 Organet kryesore të Urdhrit

1. Organet kryesore të Urdhrit të Mjekëve janë:

- a) Asambletë;
- b) Këshillat;
- c) Presidentët e Urdhrit;
- ç) Komisionet e Gjykitimit Disiplinor Profesional;

2. Zgjedhjet në organet e sipërmendura duhet të sigurojnë përfaqësim 30% të tyre nga gjinia femërore në përputhje me Ligjin Nr. 9970, datë 24.07.2008 "Për barazinë gjinore në shoqëri".

3. Për t'i ardhur në ndihmë çdo proçesi zgjedhor për organet drejtuese të Urdhrit të Mjekëve, për Presidentët e Këshillave Rajonale dhe Presidentin e Këshillit Kombëtar hartohen dhe miratohen Udhëzime të veçanta nga Këshilli Kombëtar.

Neni 15 **Asambletë**

A- Asamblea Kombëtare përbëhet nga tërësia e të gjithë anëtarëve të Këshillave Rajonale dhe është organi më i lartë drejtues dhe vendimmarrës.

Asamblea i zhvillon mbledhjet e zakonshme çdo 5 (pesë) vjet. Midis këtij harku kohor, kur është e domosdoshme, ajo mund të thirret në mbledhje të jashtëzakonshme;

Në çdo rast, mbledhja e Asamblesë Kombëtare thirret nga:

- a. Presidenti i Këshillit Kombëtar;
- b. Kur kërkohet nga 1/3 e të gjithë anëtarëve të Asamblesë Kombëtare;

Asamblea Kombëtare zgjedh Këshillin Kombëtar.

B- Asamblea Rajonale është organi më i lartë drejtues e vendimmarrës i Urdhrit të Mjekëve të Rajonit dhe përbëhet nga tërësia e anëtarëve të tij..

Asamblea Rajonale zgjedh anëtarët e Këshillit Rajonal përkatës, duke ndjekur parimin një anëtar një votë.

Përbërja e anëtarësisë së Këshillave Rajonale të Urdhrit të Mjekëve do të jetë si më poshtë:

- Këshilli Rajonal i Urdhrit të Mjekëve Qarku Shkodrë - 5 (pesë) anëtarë, = 3 nga Shkodra, 1 Malësia Madhe, 1 Puka;
- Këshilli Rajonal i Urdhrit të Mjekëve Qarku Lezhë - 5 (pesë) anëtarë = 3 Lezha, 1 Kurbini, 1 Rrëshen;
- Këshilli Rajonal i Urdhrit të Mjekëve Qarku Kukës - 5 (pesë) anëtarë = 3 Kukësi, 1 Tropoja, 1 Hasi;
- Këshilli Rajonal i Urdhrit të Mjekëve Qarku Dibër - 5 (pesë) anëtarë = 3 Dibra, 1 Bulqiza, 1 Burreli;
- Këshilli Rajonal i Urdhrit të Mjekëve Qarku Durrës - 5 (pesë) anëtarë = 4 Durrësi, 1 Kruja;

- Këshilli Rajonal i Urdhrit të Mjekëve Qarku Elbasan - 5 (pesë) anëtarë = 2 Elbasan, 1 Librazhd, 1 Gramsh, 1 Peqin;
- Këshilli Rajonal i Urdhrit të Mjekëve Qarku Berat - 5 (pesë) anëtarë = 2 Berat, 1 Kuçovë, 1 Dimal, 1 Skrapar;
- Këshilli Rajonal i Urdhrit të Mjekëve Qarku Fier - 5 (pesë) anëtarë = 3 Fieri, 1 Lushnja, 1 Ballsh;
- Këshilli Rajonal i Urdhrit të Mjekëve Qarku Tiranë - 7 (shtatë) anëtarë = 6 Tirana, 1 Kavaja;
- Këshilli Rajonal i Urdhrit të Mjekëve Qarku Korçë - 5 (pesë) anëtarë = 2 Korça, 1 Erseka, 1 Bilishti, 1 Pogradeci;
- Këshilli Rajonal i Urdhrit të Mjekëve Qarku Vlorë - 5 (pesë) anëtarë = 5 Vlorë;
- Këshilli Rajonal i Urdhrit të Mjekëve Qarku Gjirokastër - 5 (pesë) anëtarë = 3 Gjirokastra, 1 Përmeti- Tepelena, 1 Saranda.

Asamblea Rajonale mbledhet çdo 5 (pesë) vjet. Midis këtij harku kohor, në raste të domosdoshme, thirrjet mbledhja e jashtëzakonshme e Asamblesë Rajonale, për të cilën detyrimisht merret miratimi me shkrim i Presidentit të Këshillit Kombëtar.

- Mbledhja e Asamblesë Rajonale thirret nga:
 - a. Presidenti i Këshillit Rajonal;
 - b. Me kërkesën e 1/3 të numrit të përgjithshëm të anëtarëve të Asamblesë.
- Asamblea Rajonale zgjedh Këshillin Rajonal.

Neni 16 **Presidentët e Urdhrit**

1. Presidentët e Urdhrit zgjidhen me votim të fshehtë nga Këshilli Kombëtar dhe ai Rajonal midis jo më pak se 2 kandidaturave alternative.
2. Këshilli Kombëtar zgjedh Presidentin e Urdhrit të Mjekëve. Presidenti zgjidhet me shumicën e thjeshtë të votave të anëtarëve të Këshillit Kombëtar. Mandati i presidentit është 5 vjet, me të drejtë rizgjedhjeje vetëm njëherë.
3. Këshillat Rajonalë zgjedhin presidentët përkatës të këshillave rajonalë. Presidentët e Këshillave Rajonale zgjidhen me shumicën e thjeshtë të votave të anëtarëve të Këshillit. Mandati i tyre është 5 vjet me të drejtë rizgjedhjeje vetëm njëherë.
4. Kandidaturat për presidentë të Urdhrit të Mjekëve duhet të përmbushin këto kritere:
 - a) të jenë jo më shumë se në moshën e daljes në pension në momentin e zgjedhjes;
 - b) të kenë jo më pak se 15 vjet eksperiencë në profesion;
 - c) të kenë përvojë dhe të dhëna të besueshme për aftësi komunikimi, organizimi e drejtimi;
 - ç) të mos jenë marrë ndaj tyre masa ndëshkimore disiplinore në 5 vitet e fundit;
 - d) të kenë integritet dhe reputacion etiko-moral dhe profesional;

dh) të kenë kryer botime shkencore;
e) të mos jenë të dënuar me vendim të formës së prerë për kryerjen e një krimi apo për kryerjen e një kundërvajtjeje penale me dashje.

5. Funkzioni i presidentëve të Urdhrit të Mjekëve është i papajtueshëm me çdo funksion tjetër administrativ, shtetëror apo politik.

6. Presidentët e Urdhrave e përfundojnë mandatin e tyre përpara kohe në këto raste:

a) kur merret vendim nga Këshillit Kombëtar ose Rajonal, me votat e jo më pak se dy të tretave të anëtarëve;

b) kur japin dorëheqjen;

c) kur dënohen me vendim gjykate të formës së prerë për kryerjen e një vepre penale;

ç) kur humbasin zotësinë e plotë për të vepruar;

d) kur bëhen të paaftë, për arsye shëndetësore, për të kryer detyrat e tyre vërtetuar nga komisioni kompetent mjekësor.

Neni 17 **Këshilli Kombëtar**

1. Këshilli Kombëtar është organi më i lartë drejtues dhe vendimmarrës i UMSH midis dy mbledhjeve të Asamblesë Kombëtare.

2. Këshilli Kombëtar përbëhet nga 25 anëtarë si vijon:

Presidentët Rajonal të sapo zgjedhur nga 12 (dymbëdhjetë) Këshillat Rajonale;

8 (tetë) anëtarët e tjerë propozohen nga vetë anëtarët e Asamblesë Kombëtare.

Anëtarët e mësipërm zgjidhen me shumicë të thjeshtë të votave. Votimi bëhet i hapur, me përjashtim të rasteve kur vetë Asamblea vendos ndryshe.

5 (pesë) anëtarë janë përkatësisht: Presidenti i Urdhrit, Zëvendësi i tij, një përfaqësues nga Ministria përgjegjëse për shëndetësinë, një përfaqësues nga Fondi i Sigurimeve të Detyrueshme të Kujdesit Shëndetësor dhe një përfaqësues nga institucionet e arsimit të lartë të caktuar nga Presidenti i Urdhrit në bazë të kriterëve të përcaktuara në Statut.

Në rast se 1 (një) apo më shumë anëtar i Këshillit Kombëtar largohet për çfarëdo arsye, mandati i tij i kalon kandidatit vijues të listës përfundimtare të zgjedhjeve në Asamblenë Kombëtare me më shumë vota.

3. Zgjedhjet në Këshillin Kombëtar bëhen çdo 5 (pesë) vjet me të drejtë rizgjedhje të anëtarëve.

4. Këshilli Kombëtar mblidhet jo më pak se 3 (tre) herë në vit. Mbledhjet e Këshillit Kombëtar thirren nga:

- a. Presidenti i Urdhrit të Mjekëve;
 - b. Me kërkesën e 1/3 të numrit të përgjithshëm të anëtarëve të Këshillit Kombëtar.
5. Vendimet e Këshillit Kombëtar janë të detyrueshme për t'u zbatuar dhe respektuar nga të gjitha strukturat dhe organet e Urdhrit në nivel qendror dhe rajonal.
6. Zgjedhjet për Këshillin Kombëtar dhe ato për Këshillat Rajonale bëhen në të njëjtën kohë.
7. Organizimi dhe veprimtaria e Këshillit Kombëtar kryhet në bazë të Rregullores për Veprimtarinë e Këshillit Kombëtar, të cilën e miraton Këshilli Kombëtar.

Neni 18

Funksionet dhe përgjegjësitë e Këshillit Kombëtar

1. Këshilli Kombëtar udhëheq dhe mbikqyr të gjithë veprimtaritë e Urdhrit, Këshillave Rajonale dhe Aparatit Qëndror Ekzekutiv. Në përmbushje të funksioneve dhe përgjegjësi të tij, Këshilli Kombëtar:
- a. harton dhe miraton Kodin e Etikës dhe Deontologjisë Mjekësore dhe organizon mbikqyrjen dhe zbatimin e tij;
 - b. harton dhe miraton Statutin dhe Rregulloret e brendshme të funksionimit të Këshillave dhe të gjithë sektorëve e strukturave të tjera të Urdhrit;
 - c. miraton strukturat organizative dhe administrative të Urdhrit në nivel kombëtar dhe rajonal;
 - ç. miraton buxhetin dhe administrimin e tij, si dhe përcakton fondet në administrim të Këshillave Rajonale;
 - d. përfaqëson dhe mbron interesat e përbashkëta të anëtarëve të Urdhrit në funksion të ushtrimit të lirë dhe autonom të profesionit;
 - dh. miraton strategjitë e zhvillimit të Urdhrit dhe me anë të strukturave të veta organizon dhe mbikqyr zbatimin e tyre;
 - e. sensibilizon dhe informon opinionin publik për misionin dhe funksionet e Urdhrit, si dhe deklaron qëndrimet e tij për probleme dhe situata të veçanta sa i takon misionit dhe atributet e tij;
 - ë. bashkëpunon me faktorë dhe aktorë të tjerë të sistemit për përmirësimin e standardeve të edukimit dhe formimit profesional të mjekëve dhe përmirësimin e cilësisë së kujdesit shëndetësor;
 - f. administron pasuritë e luajtshme dhe të paluajtshme të Urdhrit në nivel qendror dhe rajonal;
 - g. miraton kuotizacionin e anëtarësisë dhe tarifën e vendosura për të gjitha aktet dhe dokumentat që lëshohen nga Urdhëri;
 - gj. zgjedh Presidentin dhe Zëvendësin e tij;
 - h. ngre grupe pune ad hoc për kryerjen e kontrolleve për standardet e ushtrimit të profesionit dhe veprimtari të tjera të Urdhrit;
 - i. miraton veprimtaritë kombëtare të Urdhrit;
 - j. mban marrëdhënie me organizma homologe dhe forume ndërkombëtare dhe ratifikon protokolle bashkëpunimi;
 - k. zgjedh anëtarët e Komisionit Kombëtar të Gjyimit Disiplinor Profesional (Apeli).

2. Për realizimin e këtyre detyrave, Këshilli del me vendime të cilat firmosen nga Presidenti i Urdhrit të Mjekëve.

Neni 19

Aparati Qëndror Ekzekutiv i Këshillit Kombëtar

Aparati Qëndror Ekzekutiv i Këshillit Kombëtar koordinon dhe kontrollon veprimtaritë e Këshillave Rajonale, veprimtaritë tekniko-administrative dhe ekonomike-financiare të Urdhrit. Siguron dhe kontrollon zbatimin dhe respektimin e Ligjeve, si dhe të Statutit e Rregulloreve të Urdhrit. Siguron dhe kontrollon zbatimin e Vendimeve të Asamblesë dhe të Këshillit Kombëtar, si dhe;

- a.** parashikon dhe propozon kuotizacionet e anëtarësisë, honoraret, tarifat e regjistrimit, anëtarësimit, tarifat për Liçensën për ushtrimin individual të profesionit, si dhe tarifa të tjera të cilat i miraton në Këshillin Kombëtar;
- b.** organizon dhe mbikqyr procesin e regjistrimit, anëtarësimit dhe administrimin e Regjistrimit të Mjekëve në nivel kombëtar e rajonal;
- c.** Mbikqyr veprimtaritë për pajisjen e mjekëve me Liçensën për ushtrimin individual të profesionit dhe përcakton kriteret për lëshimin e saj;
- ç.** emëron ose miraton sipas kriterëve të specifikuar në këtë Statut, komisione apo grupe pune me karakter të përhershëm, të cilat i miraton me Vendim të Këshillit Kombëtar;
- d.** drejton dhe mbikqyr sistematikisht veprimtaritë e Këshillave Rajonale;
- dh.** organizon veprimtari shkencore, trajnime e seminare kualifikuese për drejtues të strukturave të Urdhrit, Komisionet Disiplinore e të tjera;
- e.** menaxhon botimin dhe shpërndarjen e Buletinit të Urdhrit, si dhe botime e shtypshkrime të tjera;
- ë.** Merr masa për organizimin dhe administrimin e proceseve zgjedhore që zhvillohen pranë Urdhrit të Mjekëve në zbatim të urdhërave, udhëzimeve dhe të akteve të tjera administrative të nxjerra nga presidenti.

Neni 20

Presidenti i Këshillit Kombëtar

- 1. Presidenti i Këshillit Kombëtar zgjidhet dhe shkarkohet me votim të fshehtë nga vet Këshilli.
- 2. Për zgjedhjen e Presidentit paraqiten më votim në Këshillin Kombëtar jo më pak se dy kandidatura alternative.
- 3. Presidenti i Këshillit Kombëtar ka këto kompetenca dhe detyra:
 - a.** drejton dhe mbikqyr të gjithë veprimtaritë e Urdhrit në rang kombëtar.
 - b.** nxjerr urdhëresa apo udhëzime për zbatimin e vendimeve të Këshillit Kombëtar.
 - c.** thërret mbledhjet e Asamblesë, të Këshillit Kombëtar.
 - ç.** thërret mbledhjet e jashtëzakonshme të Asambleve dhe Këshillave Rajonale.

- d.** në kuadër të marrëdhënieve me institucionet e administratës shtetërore, si dhe organizma të tjera brenda e jashtë vendit, përfaqëson Këshillin Kombëtar dhe shprehet në emër të tij.
- dh.** Në raste të veçanta, i autorizon të drejtën e nënshkrimit të dokumentave Zv.Presidentit ose Sekretarit të Përgjithshëm.
- e.** vet emëron ose shkarkon Sekretarin e Përgjithshëm, si dhe punonjësit e aparatit të cilët nuk janë të zgjedhur.
- ë.** midis dy mbledhjeve të Këshillit Kombëtar merr vendime në emër të tij, të cilat i ratifikon në mbledhjen e rradhës të Këshillit.
- f.** thërret drejtues institucionesh, shërbimesh apo mjekë kur ka ndodhi në shërbimet e tyre dhe sipas rastit i këshillon, i relatton për proces disiplinor në Urdhrit e Mjekëve ose i paralajmëron.
- g.** miraton emërimin apo shkarkimin e punonjësve jo të zgjedhur pranë Këshillave Rajonale.
- gj.** Ndërmerr nisma propozimi në organet ligjvënëse për projektligje apo dokumente të rëndësishme në fushën e shëndetësisë.
- h.** propozon në strukturat e Urdhërit kandidatura për t'u zgjedhur apo shkarkuar në organet e Urdhrit.
- i.** i propozon Këshillit Kombëtar, anëtarë të Urdhrit për dekorime dhe vlerësime të ndryshme;
- j.** organizon dhe mban marrëdhënie me organizma e forume ndërkombëtare dhe ratifikon në Këshillin Kombëtar marrëveshje dhe protokolle bashkëpunimi me to;
- k.** miraton pagat e të gjithë punonjësve të Aparatit Qëndror Ekzekutiv dhe strukturave të Këshillave Rajonale, shpërblime, honorare, etj.

4. Përpara çdo vendimmarrje të rëndësishme, Presidenti i Këshillit Kombëtar konsultohet me drejtuesit e tjerë të Këshillit Kombëtar,

Neni 21

Zv.Presidenti i Këshillit Kombëtar

1. Zv.Presidenti i Këshillit Kombëtar zgjidhet dhe shkarkohet nga Këshilli Kombëtar.
2. Detyrat dhe funksionet e Zv.Presidentit janë:
 - a.** mbikqyr dhe ndjek zbatimin e vendimeve të Këshillit Kombëtar, si dhe të Urdhëresave dhe Udhëzimeve të Presidentit të Këshillit Kombëtar;
 - b.** mban kontakte me Këshillat Rajonale dhe monitoron në vazhdimësi veprimtarinë e tyre;
 - c.** monitoron veprimtarinë administrative të Aparatit Qëndror Ekzekutiv dhe sektorëve pranë këtij Aparati dhe përgjigjet për mbarëvajtjen e tyre në mënyrë të veçantë sa i përket Edukimit të Vazhdueshëm Mjekësor, formimit profesional, zhvillimit të praktikës profesionale dhe standardeve të ushtrimit, etj;
 - ç.** monitoron proceset e regjistrim-liçensimit në nivel qendror dhe rajonal dhe të mirëadministrimit të Regjistrimit Themeltar Kombëtar dhe Rajonal;
 - d.** e informon dhe mban të azhornuar Presidentin për të gjithë detyrat që mbulon;
 - dh.** në mungesë dhe me porosi të tij merr kompetencat e Presidentit të Këshillit Kombëtar për periudhën që ai mungon.

Neni 22

Sekretari i Përgjithshëm

Sekretari i Përgjithshëm është përgjegjësi kryesor për problemet tekniko-organizative të Këshillit Kombëtar dhe të Aparatit të tij. Ai mund të jetë mjek, jurist, sociolog ose ekonomist.

Sekretari i Përgjithshëm kryen këto detyra:

1. Drejton dhe kontrollon mbarëvajtjen e punës në Aparatin Qëndror të Këshillit Kombëtar.
2. Mban kontakte me këshillat rajonale dhe koordinon veprimtarinë e tyre.
3. Kujdeset për krijimin dhe organizimin e komisioneve dhe grupeve të punës që ngrihen pranë keshillave të Urdhrit dhe kontrollon veprimtarinë e tyre.
4. Organizon mbledhjet e Këshillit Kombëtar.
5. Organizon marrëdhëniet publike dhe kontaktet me institucionet shtetërore dhe jo shtetërore të vendit, si dhe me organizata e forume ndërkombëtare.
6. Raporton dhe informon sistematikisht Presidentin dhe në mungesë të tij Zv. Presidentin lidhur me mbarëvajtjen e punës dhe detyrat specifike të tij.
7. Organizon dhe drejton punën për daljen e Buletinit dhe kujdeset për shtypshkrime të tjera.

Neni 23

Këshilli Rajonal

1. Këshilli Rajonal është organi më i lartë drejtues dhe vendimmarrës i UM të Rajonit midis dy mbledhjeve të Asamblesë Rajonale.
2. Këshillat Rajonale janë 12 dhe krijohen sipas ndarjes territoriale. Në zona të veçanta me vendim të Këshillit Kombëtar mund të ngrihen seksione apo këshilla nënrajonale (zonale) me ministrukturë të specifikuar.
3. Zgjedhjet e Këshillit Rajonal bëhen çdo 5 (pesë) vjet me të drejtë rizgjedhje të anëtarëve.
4. Këshilli Rajonal përbëhet nga: 5-9 anëtarë të zgjedhur nga Asamblea Rajonale sipas kriterëve të përcaktuara në këtë Statut dhe në varësi të numrit të përgjithshëm të anëtarëve.
5. Në rast se (1) një anëtar i Këshillit Rajonal largohet për çfarëdo arsye, mandati i tij i kalon kandidatit vijues të listës përfundimtare të zgjedhjeve në Asamblenë Rajonale me më shumë vota.

Neni 24

Funksionet dhe përgjegjësitë e Këshillit Rajonal

a. Këshilli Rajonal zgjedh Presidentin dhe Zëvendësin i tij. Mandati i Presidentit është 5 vjet, me të drejtë të një rizgjedhje. Funkzioni i tyre është i papajtueshëm me çdo funksion tjetër administrativ, shtetëror apo politik;

- b.** Këshilli rajonal propozon emërimin ose shkarkimin e Sekretarit të tij. Sekretari i Këshillit Rajonal duhet të jetë me arsim të lartë, preferohet mjek ose jurist, kompetencat dhe detyrat e Sekretarit të Këshillit Rajonal janë të përfshira në Rregulloren e veprimtarisë së Këshillave Rajonale;
- c.** krijon dhe mban të azhornuar Regjistrin Themeltar Rajonal të Mjekëve duke pasqyruar në të çdo ndryshim në karrierën e tyre profesionale;
- ç.** pajis mjekët me Liçensën për ushtrimin individual të profesionit;
- d.** siguron zbatimin e vendimeve dhe udhëzimeve të Këshillit Kombëtar apo të Aparatit Qëndror Ekzekutiv të tij;
- dh.** kryen veprimtaritë për njohjen dhe ndërgjegjësimin e bashkësisë së mjekëve të juridiksionit të vet me Kodin e Etikës dhe Deontologjisë Mjekësore, aktet normative, misionin, synimet, funksionet dhe detyrat e Urdhrit;
- e.** analizon periodikisht veprimtaritë e Urdhrit në Rajon;
- ë.** bazuar në Rregulloren e Gjykimit Disiplinor Profesional, organizon proceset disiplinore të shkallës së parë;
- f.** sensibilizon dhe informon publikun për funksionin dhe kompetencat e Urdhrit me veprimtari të drejtpërdrejta me kontigjente të publikut ose nëpërmjet mediave;
- g.** zgjedh anëtarët e Komisionit të Gjykimit Disiplinor Profesional Rajonal (shkalla e parë);
- gj.** ngre komisione apo grupe pune të përkohshme në përputhje me veprimtarinë e tij. Për këtë njofton paraprakisht Aparatin Qëndror Ekzekutiv të Këshillit Kombëtar dhe merr miratimin e tij;
- h.** përfaqëson dhe mbron interesat e anëtarësisë lidhur me të drejtën për ushtrimin e lirë e të pavarur të profesionit mjekësor;
- i.** administron buxhetin dhe të gjitha pasuritë e Urdhrit në nivel rajonal;
- j.** shpreh hapur qëndrimet dhe opinionet e tij për ngjarje e situata të veçanta mjekësore në rajon brenda limiteve të misionit dhe të funksioneve të Urdhrit;
- k.** organizon punën për mbledhjen e kuotizacioneve dhe të detyrimeve të tjera të anëtarëve.
- l.** nënshkruan protokolle bashkëpunimi me institucionet e administratës shtetërore, me organizma jo qeveritare brenda rajonit, si dhe me organizata homologe të vendeve fqinje;
- ll.** nxit organizimin dhe zhvillimin e veprimtarive studimore shkencore dhe kualifikuese të mjekëve të rajonit dhe pjesëmarrjen e tyre në programet e Edukimit të Vazhdueshëm Mjekësor;
- m.** i propozon Presidentit të Këshillit Kombëtar për dekorime, vlerësime, shpërblime, si dhe për ndihma në raste fatkeqësish për anëtarët e Urdhrit në rajon;
- n.** këshilli rajonal thërret mjek ose/dhe drejtues institucionesh kur ndaj tyre, apo shërbimeve që ata drejtojnë që ka ankesë ose shprehje pakënaqësie, i këshillon dhe sipas rastit i relaton ose i paralajmëron për gjykim disiplinor. Të gjitha këto pasqyrohen në Dosjen personale të mjekut dhe protokolle të posaçme.

Neni 25

Thirrja e Këshillit Rajonal

Mbledhja e Këshillit Rajonal thirret nga Presidenti i këtij Këshilli, ose në mungesë të tij nga Zv. Presidenti. Mbledhjet e Këshillit bëhen jo më pak se 3 (tre) herë në vit. Mbledhja e jashtëzakonshme thirret nga Presidenti i Këshillit Kombëtar, ose me miratimin e tij me shkrim

kur e kërkon Këshilli Rajonal.

Neni 26

Kriteret për zgjedhjen e anëtarëve të Këshillave të Urdhërit

Kandidaturat për anëtarë të Këshillit Kombëtar dhe të Këshillave Rajonale zgjidhen ndër mjekët më të dalluar, të përkushtuar, me aftësi dhe autoritet profesional dhe duhet të plotësojnë këto kritere:

- a.** të jetë shtetas shqiptar;
- b.** të jenë anëtarë të regjistruar pranë Urdhrit për një periudhë kohore 10 vjeçare, pandërprerje;
- c.** të ketë reputacion etiko-moral dhe profesional;
- ç.** të ketë përvojë dhe të dhëna të besueshme për aftësi komunikuese, dhe të ketë shfaqur korrektësi në zbatimin e normave dhe rregullave në jetën shoqërore, në komunikimin me publikun, pacientët, kolegët, si dhe me drejtuesit;
- d.** të mos jetë ndëshkuar me vendim të formës së prerë për kryerjen e një krimi apo kundravajtje penale, si dhe gjatë 5 (pesë) viteve të fundit të mos ketë marrë masa ndëshkimore disiplinore.
- dh.** të mos ketë funksione drejtuese në administratën shtetërore dhe të mos bëjë pjesë në forume drejtuese partiake të çdo niveli qofshin, nga të cilat detyrimisht duhet të jetë dorëhequr në momentin e kandidimit.
- e.** të ketë kontribute dhe të ketë qenë i aktivizuar në strukturat dhe veprimtaritë e Urdhrit.

Neni 27

Ndërprerja e parakohshme e mandatit të anëtarit të Këshillit

Anëtarit të Këshillit (Kombëtar dhe Rajonal) i ndërpritet para kohe mandati kur:

- a.** kërkon vetë dorëheqje;
- b.** dënohet me vendim të formës së prerë nga organet e Urdhrit apo nga gjyqësori;
- c.** shpërdoron detyrën;
- ç.** mungon më shumë se 3 (tre) herë në mbledhjet e Këshillit pa shkaqe të justifikueshme;
- d.** paaftësohet për arsye shëndetësore;
- dh.** kur humbasin zotësinë e plotë për të vepruar;
- e.** emërohet apo zgjidhet në detyra drejtuese shtetërore apo partiake që bien ndesh me kriteret e parashikuara në këtë Statut për zgjedhjen e anëtarëve të Këshillit Kombëtar dhe të Këshillave Rajonale.

Neni 28

Presidenti i Këshillit Rajonal

1. Presidenti i Këshillit Rajonal ka atributet e përfaqësimit të Këshillit Rajonal, si dhe vendimmarrjes midis 2 mbledhjeve të Këshillit. Vendimet e tij i ratifikon mbledhja e

Këshillit. Ai organizon, udhëheq dhe mbikqyr veprimtaritë e Këshillit dhe Urdhrit të Mjekëve në Rajon.

Për këtë qëllim, Presidenti i Këshillit Rajonal:

- a. thërret dhe drejton mbledhjet e Këshillit në përputhje me normat statutores;
- b. harton planin e veprimit të Këshillit, të detajuar me objektiva dhe afate kohore zbatimi;
- c. përcakton detyrat për anëtarët e Këshillit dhe kontrollon zbatimin e tyre;
- ç. mban të azhurnuar anëtarët e këshillit me vendimet e Këshillit Kombëtar, Urdhëresat dhe Udhëzimet e ndryshme që vijnë nga Aparati Qëndror Ekzekutiv i Këshillit Kombëtar;
- d. raporton dhe informon sistematikisht Aparatin Qëndror Ekzekutiv për veprimtaritë e Këshillit Rajonal, shqyrtimin e ankesave, proceset disiplinore, si dhe për zbatimin e udhëzimeve dhe të urdhëresave të ardhura nga Aparati;
- dh. mban në kontroll dhe kujdeset për proceset e regjistrimit, liçensimit, azhornimit e regjistrimit dhe pasqyrimin e tij në faqen e internetit;
- e. merr masa për mbledhjen dhe derdhjen e kuotizacioneve të anëtarësisë dhe detyrimeve të tjera financiare.

Neni 29

Mbledhjet e Këshillave

Presidenti i Këshillit (Kombëtar apo Rajonal), në mungesë Zëvendës i tij vendos për datën, kohën dhe rendin e ditës së çdo mbledhje.

Mbledhja e Këshillit (Kombëtar apo Rajonal) njoftohet me shkrim 7-14 ditë përpara, duke bërë të ditur edhe rendin e ditës.

Kriteret e mësipërme mund të mos zbatohen vetëm në raste e rrethana të veçanta. Në çdo mbledhje duhet të jenë të pranishëm me shumë se gjysma e anëtarëve, të cilët paraprakisht miratojnë rendin e ditës dhe zhvillimin e mbledhjes.

Neni 30

Marrja e vendimeve (vendimmarrja)

1. Këshilli (Kombëtar apo rajonal) merr vendim vetëm për çështje të cilat janë përfshirë në rendin e ditës së mbledhjes, përveç rasteve kur shumica e anëtarëve të pranishëm janë dakort për shqyrtimin dhe marrjen e vendimeve edhe për çështje që nuk janë në rendin e ditës.

2. Vendimet merren me votime të hapura, përveç rasteve kur me shumicën e votave të anëtarëve të pranishëm vendoset ndryshe.

3. Vendimet merren me shumicën e thjeshtë të votave të anëtarëve të pranishëm në mbledhje. Bëhet përjashtim nga ky rregull kur kërkohet shumicë e cilësuar. Kur ka barazim të votave, kryhet një votim i dytë. Nëse edhe në votimin e dytë përsëritet e njëjta situatë, vota e Presidentit është vendimtare.

Neni 31

Vlefshmëria e mbledhjes

Mbledhja e Këshillit (Kombëtar apo atij Rajonal) është e vlefshme kur janë të pranishëm me shumë se gjysma e anëtarëve. Kur në hapjen e mbledhjes kjo shumicë nuk arrihet, atëherë Presidenti apo zëvendësi që drejton mbledhjen, vendos thirrjen e mbledhjes një ditë tjetër, duke përsëritur njoftimin me shkrim.

Neni 32

Proçesverbali i mbledhjes

Në çdo mbledhje mbahet një proçesverbal ku shkruhet data, vendi i mbledhjes, pjesëmarrësit, çështjet që u diskutuan, vendimet që u morën, si dhe forma e rezultati i votimit.

Presidenti i Këshillit Rajonal apo Kombëtar cakton një person të përhershëm për mbajtjen e proçesverbalit.

Në mbarim të mbledhjes, proçesverbali nënshkruhet nga mbajtësi (sekretari) dhe Presidenti i këshillit ose zëvendësi që ka drejtuar mbledhjen.

Neni 33

Komisionet Disiplinore

1. Pranë Këshillit Kombëtar dhe Këshillave Rajonale funksionojnë Komisionet Disiplinore, përkatësisht Komisioni Disiplinor Kombëtar dhe Komisioni Disiplinor Rajonal. Komisioni Disiplinor Kombëtar dhe ai Rajonal përbëhen respektivisht nga 15 dhe 9 anëtarë, të cilët miratohen me vendim të këshillit përkatës. Për çdo rast gjykimi disiplinor, nga numri i përgjithshëm i këtyre Komisioneve, ngrihen trupat e gjykimit.

2. Komisionet Disiplinore janë organizma të gjykimit disiplinor profesional të pavarur. Ato verifikojnë dhe shqyrtojnë ankesat dhe kërkesat që vijnë nga çdo person apo institucion në Urdhrin e Mjekëve për shkelje të Etikës dhe Deontologjisë Mjekësore, për kequshtrim profesioni dhe gabime mjekësore.

3. Kriteret e përzgjedhjes dhe miratimit të anëtarëve, organizimi i proçeseve disiplinore bazohen në rregulloren e Gjykimit Disiplinor Profesional, e cila miratohet me vendim të Këshillit Kombëtar.

Neni 34

Kompetencat ndëshkimore

(masat disiplinore)

1. Komisioni Disiplinor heton dhe gjykon në bazë të fakteve dhe provave të administruara në seancë dëgjimore. Kur vërtetohet së anëtari ka kryer shkelje të Kodit të Etikës dhe Deontologjisë Mjekësore, Ligjit dhe akteve të tjera kodifikuese lidhur me ushtrimin e profesionit, e shpall atë fajtor dhe i jep këto masa:

- a) Vërejtje me shkrim;
- b) Vërejtje me paralajmërim;
- c) Gjobjë, nga 15 000 (pesëmbëdhjetë mijë) lekë deri në 100 000 (njëqind mijë)

lekë;

ç) Propozim për shkarkim nga funksione drejtuese në institucione shëndetësore publike dhe private.

d) pezullim nga e drejta e zgjedhjes në organet drejtuese të Urdhrit të Mjekëve deri në 3 (tre) vjet;

dh) Përrjashtim i përkohshëm nga Urdhri i Mjekëve për një periudhë deri në 3 (tre) vjet.

2. Masa ndëshkuese e parashikuar në shkronjën "dh" sjell si rrjedhojë ç'regjistrim nga Regjistri i Mjekëve të Rajonit dhe ai Kombëtar, si dhe heqjen e të drejtës së ushtrimit të profesionit për afatin e caktuar në Vendimin Disiplinor.

3. Masat disiplinore të përcaktuara në pikën 1 të këtij neni mund të shlyhen, në qoftë se ndaj anëtarit nuk është marrë ndonjë masë tjetër disiplinore brenda 1 (një) viti nga data e dhënies së tyre për shkronjat "a" dhe "b", dhe brenda 3 (tre) vjetësh për shkronjat "ç", "d", dhe "dh", të pikës 1 të këtij neni.

4. Gjoha e vendosur sipas shkronjës "c" të pikës 1 të këtij neni derdhet në Buxhetin e Shtetit.

5. Përveç masave disiplinore të parashikuara në pikën 1 të këtij neni, si masë plotësuese, Komisioni ka të drejtë t'i caktojë anëtarit të ndëshkuar, kryerjen e një kualifikimi ose studimeve plotësuese të barabarta me 20 kredite.

6. Të gjitha shpenzimet për kryerjen e proçeseve disiplinore përballohen nga buxheti i Urdhrit të Mjekëve.

Neni 35

Ankimimi për vendimet disiplinore

Ankimimi kundër vendimeve të marra nga Komisionet e Gjykimit Disiplinor bëhet në bazë të afateve dhe mënyrave të përcaktuara në Rregulloren për Gjykimit Disiplinor Profesional.

Neni 36

Komisione të tjera dhe grupe pune (ad-hoc)

Me vendim të Këshillit Kombëtar, pranë Këshillit Kombëtar dhe Këshillave Rajonale, sipas nevojës krijohen komisione apo grupe pune të përhershme ose të përkoheshme.

Veprimtaria e këtyre komisioneve bazohet në rregulloret përkatëse të cilat miratohen gjithashtu, me vendim të Këshillit Kombëtar.

Pjesa e tretë

Financat

Neni 37

Buxheti

1. Urdhri i Mjekëve ka buxhetin e tij, të cilin e miraton dhe administron Këshilli Kombëtar në përputhje me Ligjin “Për Urdhrin e Mjekëve në Republikën e Shqipërisë”, me rregullat financiare në fuqi, si dhe me Rregulloren e brendshme për Veprimtarinë Financiare të Urdhrit të miratuar nga Këshilli Kombëtar.

2. Burimet financiare të Urdhrit të Mjekëve janë:

- a) kuotizacionet e anëtarëve;
- b) tarifatat e vendosura për aktet dhe dokumentet e lëshuara nga Urdhri;
- c) donacione të ndryshme dhe të ardhura të tjera të ligjshme.

3. Të ardhurat e siguruara, sipas përcaktimit të bërë në pikën 2, të këtij neni, Urdhri i përdor për të përmbushur synimet dhe objektivat e tij në përputhje me statutin dhe me këtë ligj.

Neni 38 **Kuotizacionet**

1. Masa e kuotizacionit përcaktohet me vendim të Këshillit Kombëtar dhe është i detyrueshëm për çdo anëtar.
2. Kur për një periudhë prej më shumë se një viti nuk shlyen kuotizacionet dhe nuk paraqet arsye të justifikueshme, i pezullohet anëtarësimi në UMSH dhe Liçensa për ushtrimin individual të profesionit.

Neni 39 **Përdorimi i burimeve financiare**

Burimet financiare të Urdhrit përdoren për:

- a) paga dhe honorare për punonjësit e administratës së Aparatit Qëndror Ekzekutiv dhe të rajoneve, për anëtarët e Këshillit Kombëtar dhe atyre të Këshillave Rajonale, për grupe pune, komisione, ekspertiza, proçese disiplinore.
- b) Shpërblime për vlerësim pune, ndihma në rast fatkeqësie për anëtarët e Urdhrit, si dhe për punonjësit e Aparatit Qëndror Ekzekutiv dhe atij Rajonal, për komisione, grupe pune, etj
- c) aktivitete të ndryshme kulturore.
- d) kontributin për sigurimet shoqërore e shëndetësore të punonjësve.
- e) detyrimet me shtetin dhe të tretët, etj.
- f) shpenzimet operative (kancelari, transport, ndërlidhje, energji, dieta, dokumentime fotografike, audiokaseta dhe videokaseta e të tjera).
- g) organizim veprimtarish shkencore-profesionale e kualifikuese (konferenca, simpoziume, sesione, seminare, trajnime, etj.).
- h) botime me karakter shkencor dhe informativ e promovues për Urdhrin.
- i) investim dhe blerje mjetesesh dhe pajisjesh pune.
- j) pjesëmarrje në aktivitete ndërkombetare, si dhe pritje e përcjellje delegacionesh të huaja.
- k) ceremoni të ndryshme përkujtimore, promovuese, etj.

KREU I KATERT

Dispozita përfundimtare

Neni 40 Emërtimi

Emri i organizmit është ***“URDHRI I MJEKËVE TË SHQIPËRISË”***

Neni 41 Stema dhe vula

Urdhri i Mjekëve të Shqipërisë ka stemën dhe vulën e tij (Këshilli Kombëtar dhe Këshillat Rajonale).

Neni 42 Rezidenca

Rezidenca e Këshillit Kombëtar është në Tiranë.

Neni 43 Llogaria bankare

UMSH-ja mban llogari bankare në lekë dhe në valutë të huaj.

Neni 44 Organi periodik

UMSH-ja nxjerr Organin e tij periodik: ***“BULETINI I URDHRI TË MJEKËVE TË SHQIPËRISË”***.

Vendimin Nr. 2, datë 28.03.2008, me Vendimin Nr 1, datë 30.04.2010, me Vendimin Nr 1, datë 22.04.2011, me Vendimin Nr. 10, datë 11.11.2011, ndërsa ndryshimet e propozuara nga grupi i punës ad-hoc pas hyrjes në fuqi të Ligjit 123/2014 "Për Urdhrin e Mjekëve në RSH", u miratuan me vendimin Nr. 1 datë 19.06.2015, ndryshuar me Vendimin e Këshillit Kombëtar Nr. 2, datë 08.11.2019.

PRESIDENTI

Dr. Fatmir BRAHIMAJ

